

Der Radikalschnitt

von Michael Mende

(Friseurgeschäft - Schild: Karin's Frisierstübchen. Frau Hafner, sehr alt, sitzt, Lockenwickler in den Haaren, im Friseurstuhl vor einem imaginären Spiegel in Richtung Publikum. Karin rollt gerade die letzten Lockenwickler ein)

Karin: Gucke Sie, Frau Hafner, do hewwe Sie ä gonz helli Strähn drinn!

Kätche: Ach Gott, ja!

Karin: Isch scheeh, gell, do kehnt ma was draus mache!

Kätche: Isch scheeh, sescht sie! Karin, Du wesch doch, daß ich nix seh. Du kehnsch ma do grad ä Bild funneme Aff nohänge, des deht isch trotzdem net merke! Unn wonn ma än Glatzkopf schneide dedsch, des wär ah grad egal, alldieweil isch sowiesou s'gonze Jahr mitteme Kopftichl rummrenn.

Karin: Ah Frau Hafner, ma will doch ä bissl gfalle, odda nett?

Kätche: Nix do, seit mein Alfons selisch nimmi isch, will isch kohm meh gfalle. Die Zeite senn vorbei. Isch kumm halt als emol zu da, daß'd ä bissl ä paar Mark verdiensch.

Karin: Des glaaw isch Ihne nett, Frau Haffner.

Kätche: Derfsch glaawe, Karin, derfsch ma ruhisch glaawe! Morjends kummds Kopftichl druff, owends kummt's runna, feddisch isch de Lack!

(Karin sieht etwas außerhalb des Ladens)

Karin: Ach Gott, wu will donn der Vadda noh? (laut) Vadda! (zu Kätche) Entschuldische Sie änn Moment, isch muß ämol noch dem Vadda gucke.

(geht hinaus, kommt mit Karl herein, dieser trägt: Stiefel, Gartenschürze, Staubsauger, Paddel und Grillzange)

Karin: Vadda, wu willsch donn Du widda noh?

Karl: Wu wärrin noh wolle um die Jahreszeit? Du konnsch valleicht dabbisch frore? Behm schneide nadirlich!

Karin: Vadda, Du siehst doch nix meh! Des meßtsch doch longsom ämol eisehe.

Karl: Wer sieht nix, sou ä dumms Gebabbl!

Karin: Wonn'd da wenigsdens ä Brill vaschreiwe losse dedsch.

Karl: Was Brill, sou Fätz!

Kätche: Net woahr, sowas brauche ma nett!

Karin: Ich bitt Sie Frau Hafner, jetzt gewwe Sie ihm nett ah noch recht!

Karl: Joh, isch doch sou, mein Groußvadda hot koh Brill gebraucht, mein Vadda hot koh Brill gebraucht und isch ...

Karin: Un, wie isch'a gschdorwe, de Groußvadda, wesch des ah noch?

Karl: Joh, weil ä Kuh uffn druffgeblotzt isch!

Karin: Unn warum?

Karl: Joh warum, weil a äm Kuhstall gschlofe hot.

Karin: Joh, weil a äm Kuhstall gschlofe hot! Weil a's Schlofzimmer net gfunne hot, sou schlecht hot'a gsehe!

Mutter: (*tritt ein*) Ach Gott, Vadda, was mesch donn Du?

Karin: Behm schneide will'a!

Mutter: Sou, Behm schneide! Hosch ah s'rischdische Werkzeug debei?

Karl: Mohnt Ihr ich bin bleed! Ich wär doch noch mei Werkzeug wisse. Modorsäg (zeigt den Staubsauger), Fuchsschwanz (Paddel) und Schär (Grillzange).

Kätche: S'Wetter isch ah recht, no wäds klappe!

Karl: Ach Gott, Kätche, Dich hawwi gar net gsehe! (geht zu ihr, sie unterhalten sich)

Karin: (zur Mutter) Der Vadda hot doch nimmi alle Tasse am Schronk, Mudda!

Mutter: Karin, des derfsch dem sou net sare! Ma muß den Monn ah ebbes gelte losse! Baß emol uff! Ich geb am imma noch klohne Uffgawe, daß a sieht, daß a wischdisch isch!

Karin: Wonn'd monsch!

Mutter: Guck emol: Jeden Morje lossin die Eia aus'm Hihnastall holle.

Karin: A die mecht'a Da doch hi!

Mutter: Freilisch mecht'a sie hi! Desweje geh ich selwa joh schun imma am halwa sechse niwwa unn holl sie. Was de Vadda holle derf senn mei drei Stopfeier, wu im neileg. Soodsch an häre, jeden Morje: „Die Hihna kumme iwwahaupt nimmi aus de Mause raus, jeden Morje drei Eier, ä routs, ä gehls unn ä griins!“

Karin: Haja, donn mohnt'a daß a noch gebraucht wärd. Awwa mi'm Behmschneide, des wärd a sich nett nemme losse, des hot'a joh imma am beschde gekennt!

Mutter: Awweil kummt ma ä Idee, wart amol.

(Sie holt einen Kugelbaum, die Kugel etwa Kopfgröße, drei Schleifen, sie stellt ihn in unmittelbare Nähe zu Kätche)

Mutter: Vadda guck amol her do!

Karl: Was donn?

Mutter: Vadda, hoisch amol, die Obstbehm do drauß, die hawwi schunn am Baumonn gsaat, daß der die schneide soll. Des isch doch koh Herausforderung meh fa Disch! Awwa der Bohm do, wonn ma denn schneide kehnsch, des wär was!

Karl: Isch schneid doch koh Blummehaffe, ah jetzt geht's grad lous!

Mutter: Des isch doch kohn Blummehaffe, Vadda. Des isch ein ... arbus kuggulus, zu deitsch ein Kugelbaum.

Karl: Mach Sache.

Mutter: Karin, holl ma mol des Buch iwwa die Kugelbehm.

Karin: Des was? (Mutter signalisiert ihr, daß sie irgendein Buch holen soll, sie bringt ein Friseurbuch) Do Mudda!

Mutter: Wu steht's donn? Awweil hawwis (liest): „Den arbus kuggulus zu schneiden sollte man nur speziell dafür ausgebildeten Stenotypistinnen überlassen!“

Karl: Alla, donn solle dies mache!

Mutter: Wenn sie aber einen Ort haben...

Karl: Hä, derf de Biejameschda ah schneide?

Mutter: „Wenn sie aber einen Ort haben, wo nur einer richtig Bäume schneiden kann und alle anderen, die sagen sie könnten es auch, es aber überhaupt nicht können, weil sie alle Dummschwätzer und Rindviehcher sind...“

Karl: Des steht do?

Mutter: Wonn i's sag! „und Rindviehcher sind und der eine hervorragend Bäume schneiden kann und Karl heißt“

Karl: Des steht do?

Mutter: Wonn i's doch les: „und Karl heißt, dann kann man den Kugelbaum auch von diesem Menschen schneiden lassen!“

Karl: Des steht do?

Mutter: Genausou!

Karl: Alla gut, donn schneid in halt, den Knigga!

Mutter: Awwa Vadda, guck da erscht nochemol däi Werkzeug oh, ob ah die rischdisch Modorsäg debei hosch?

Karl: Warum donn, Dunnaweddl, was isch donn des?

Karin: Än Staubsauger Vadda!

Karl: (geht fluchend ab) Dunnaweddl awwara, wer dutt donn än Staubsauger än die Scheia? Sakramoscht nochemol...

Karin: Du hosch'än halt äm Griff, Mudda!

Mutter: Des will i mohne, alla Karin, los die Frau Hafner nett warte, isch muß hoddisch äns Lagerhaus niwwa. (ab)

Karin: So jetzt weida äm Text, Frau Hafner...(Telefon klingelt). Also hait keensch grad uff de Sau naus, do kummsch doch zu nix. (gekünstelt) Karin's Frisierstübchen, guten Tag! ...

Haja, des hawwi ma grad gedenkt. Schunn hait morje hot a sou blaß ausgesehe, isch hab ma's gedenkt, daß do ebbes kummt, awwa wejem Ausflug hot'a halt ubedingt mitmesse. Ich hollen, ja, äm deutsche Reich, losse sie'n grad bei de Wärtleit, ja isch fahr glei niwwa. Ja, noh, koh Problem, danke, bis gleich, ja. Frau Hafner, sie misse entschuldische, awwa isch muß schnell de Benjamin... ach Gott do, die schläft. No los'i sie grad schlofe, bin jo ännare Värtelstund widda do. Unn der Bohm (trägt genervt den Kugelbaum hinaus). So jetzt awwa hoddisch. (ab)

(Karl erscheint, diesmal mit komplett richtigem Werkzeug).

Karl: Wu ischan der Vrecka? Di vaarsche mich doch. Mohne die, daß isch net weiß, daß sie ma jeden Morje Stopfeier vorleje! Unn jetzt solli den Vrecka do schneide! Onn die Melkohlag derf'i jo ah nimmi, seit'i de ohne Kuh den Gaadeschlauch ons Aiter geklemmt hab! Awwa denne gewi's! Jetzt kriege sie's zurick! Dem schneid'i ofach de Kopf ab, dem Kugelblitz, donn hewwe sie de Salat!

(Er startet die Motorsäge, stoppt sie jedoch wieder)

Karl: Abba, donn heißt widda: „Du alter Dabb! Dich kann ma ah nix heeße!“ No gucke ma halt emol. Schneide man halt, den Besse, den vamaledete. (Betastet den Lockenwickler-Kopf von Kätche) Ah was isch donn des farren Bohm! Zwei Bletta unn sunschd nur Äscht! Alla kumm - egal, ratz fatz gschnitte des Ding, drei

Seitetrieb ohn Mitteltrieb unn de Kessl isch gflickt! (schneidet Kätche alle bis auf die vier Locken ab)

Karin: (kommt herein) Vadda! Um Gott's Wille! Was mesch donn Du?

Karl: Was hawwi donn jetzt widda verkehrt gmacht?

Karin: (*schiebt ihn hinaus*) Naus jetzt mit Dir, bevor ma de Krare platzt, naus jetzt mit Dir.

Mutter: (*die entgegen kommt*) Was hot'an gmacht? (*sieht Kätche*) Um Gott's Wille! Um Gottes Wille, der Vadda!

Karin: (zurück) Sou Mutta, jetzt hemma de Kuggelbohm gschnitte, was mohnsch wonn'a uffwacht, de Kuggelbohm, die schlächt uns dout.

Mutter: Karin, jetzt messe ma uns was eifalle losse, sunschd hosch ä Gschäftl ghabt. Paß uff, geh naus unn hol de Kugelbohm.

Karin: De Kugelbohm?

Mutter: Frog nett, hollen!

(Die Mutter stellt den Kugelbaum genau hinter Kätche)

Mutter: Sou, jetzt wecksch sie.

Karin: (*ängstlich*) Mohnsch!

Mutter: Mach halt!

Karin: (*vorsichtig*) Frau Hafner. Frau Hafner!

Kätche: Ah glaabschs, jetzt binni doch eigschlofe. Bisch fäddisch Karin?

Karin: (*ängstlich*) Do isch de Spiggl.

Kätche: (schaut, zögernd, verduzt, dann plötzlich) No, wie schehh! Ach no, un drei Schlipflin hot sie ma neigmacht, no, sou ebbes Scheenes! Prima hoschs widda gmacht, Karin. (*im Abgehen*) Ich glaab hait geh'i mol widda uhne Kopftichl uff'd Stroß, sou schee wie isch jetzt bin! (*Karin und Mutter erstarrt, Kätche nun belustigt*) Guck, des heede sie ma jetzt geglaabt! Kumm geb's Kopftichl her, daß'i hohmkumm! Weil, souviel loßt Eich gsaat sei: Den Bohm do (*zeigt auf ihren Kopf*) konsch noch sou scheeh schneide, der bringt de Lebtag koi Fricht mehr! (*ab*)